

四庫全書

集部

欽定四庫全書

集部

北山集卷二十一

詳校官庶吉士

臣柳遵祖

主事

臣

呂雲棟覆勘

總校官

調編修

臣

倉聖脉

校對官中書

臣

張慎和

謄錄監生

臣

隋琦

欽定四庫全書

北山集卷二十一

宋 鄭剛中 撰

先君守官醴陵日予嘗隨先生讀書嶽麓山法華臺上時年一十五今茲再來四十有七年矣置榻設几之處歷歷可尋感而賦

愚翁髻髻昔垂耳曾向華臺借牕几小冠短褐隨先生風雨孤燈讀經史氣粗膽大眼無人拔擢犀象角連齒

那知物外有沆瀣但欲書中覓青紫當持杯酒望高城  
吊彼洛陽年少子棘闥裹飯三十年百煉自知俱統指  
後來脚踏官職場恩重如山報無幾今茲踈髮蓬霜顛  
蹤跡舊遊真愧恥一松一石如雅故應笑愚翁今乃爾  
愚翁明日便南去歲月曷其重致此憑欄之恨在無言  
珍重湘西山與水

濛濛雨中春

濛濛雨中春回首失殘臘茸茸亭前草新舊已相雜纍

因守僧牕日懼萬鈞壓有罪可縻軀無僕堪荷鍤門前  
蒼蘚深戶外蛛網合時與逢迎者雲中一孤塔

荊州之川曰江曰漢曰沱曰潛曰三澨其澤曰雲  
夢漢志謂三澨在江夏竟陵竟陵即今之景陵復  
州是也春秋傳楚子與鄭伯田於江南之夢夢與  
雲自不同渡武昌道漢陽至復州非冬晴水涸則  
渺漫極目乃三澨之尾所謂夢澤也已巳二月春  
水未生行蒲稗間累日將至景陵望孤城蓋大澤

中之環堵州治即古章臺也

江氣藏空濶春雲壓洲渚蒲稗迷遠目斷續川陸阻野  
鹿頗公行寒花自幽吐不知何處村時擊祭神鼓遙望  
景陵治大澤置環堵行行即城闔民舍雜官府編蘆辨  
門巷具體亦何數幽哉沮如旁謂是囚伏所茅茨隱柴  
扉一竹便撐拄四圍榆柳青風擾亂花舞十日南牕下  
卧聽清明雨此是古章臺家山在何許

鄰家送蘿服并借棊具戲作一篇欲簡泮宮後不住

有客餉園蔬偕我兼基局幽人本多睡欣起快雙目念  
茲兩奩中勝負等榮辱勿作勝負觀此戲殊不俗要須  
先生來一笑供捧腹餘罌猶有酒晚食正無肉願共南  
牕風糝此菜根玉

知識相問多以封州氣候寬涼為言大暑中因念  
退之云柳之為州在嶺之上中州清淑之氣於是  
焉窮矣封州去柳又幾程氣候不問而知因賦此  
篇

退之序郴陽水駛山不平中州清淑氣至此鬱以停封  
州在災方更過郴幾程不瘴已甚幸謂涼茲豈情山窮  
人盡瘦草茂虎公行濃雲從地起地氣還相蒸靈雨洞  
洗之十日不得清閑門坐小室歌尊視餘傾見酒暫懽  
喜孤吟步中庭炎燠亦何有感恩淚縱橫

偶書

冬溫霜氣薄日暮嵐煙重蕭然一區宅半與主人共門  
前行跡稀病足免迎送觀書忽倦懶酒力亦微動寒燈

吐孤花布被尋幽夢

慨蒙氏廳廊為居廳壁而後  
主人居之故有半共之句

對月再用韻

團團滿庭月冷侵華霜重何人萬里外與此孤光共摩  
雲度征鴻天濶目難送三杯見妙理一靜服羣動陶然  
夜氣中可以觀幻夢

封州學東池歲率孳魚冬晚粥之用佐養士教授  
高公補之至以紹興己巳之春夏偶微旱至秋掌  
計者告匱試出池魚則比舊加三倍得衆謂公躬

自臨池魚不化為芑苴故所獲如是觀如居士曰  
漢武帝時海旁民入租漁海魚不勝計縣官利而  
取之魚不出捐以予民魚乃再來由是知物之繁  
夥皆天道盈寡之意教授念念以廩餼不繼為憂  
則盛池魚以豐其入亦天意哉戲賦之

縣官漁海魚不登捐以予民魚乃復一物豐耗皆有道  
大抵天心憐不足先生手持尺二槐教養專為周王來  
旦旦升堂說書罷只恐廩餼生塵埃池魚賣錢補司計此

是從來學宮例今年張網牽紫鱗魚出錢歸稱數倍青  
衿摩腹談經史笑謂東池昔無此豈識先生東海頭一  
竿不數任公子

八月來大濁暑小屋真甌釜土人謂自是以往雖  
窮冬亦然既而十二日得秋分之氣牕牖涼生與  
東南無異固知造物之妙人豈能盡識之賦此四  
韻

萬物由造化誰通天地心柴門閉濁暑汗雨如滂淫便

謂嶺外熱四序常相尋露氣潤清曉方知秋意深

梅花

玉骨透花寒水壺清露滴暗香驚返魂移自芝蘭側態  
懃置書几粲粲百態出徘徊欲與語奈此雪霜色高標  
邈難親欲踈還不得箇中須有詩苦覓不到筆要須明  
月來託之問姑射

學山野燒異常登高望泮宮如在火池中間泮師  
率諸生救之下至麤糲飲食悉以投火久而撲滅

護持一學固有功然不豫除草莽絕火路亦其過也戲為賦之

傳道官頗清防患計微拙學宮牆外草十里望不絕芟  
除失豫備滋蔓久盤結野燒因風起四垣俱烈烈堂上  
簾低垂飛灰如落雪天矯逼簷檻流燄向門闌何但光  
孔聖亦已照十哲諸生固猝猝矩步未敢越相與望而  
畏鹿駭驚鷗決似聞先生窘書麕自提挈傾盆漿一空  
戛金羹亦竭勢過萬興薪杯水謾毫末頗欲伏忠信石

壁驗莊列顧茲烟燼高難試膚與髮護持終有物遠近  
同撲滅趨涼尋木陰氣定始焦渴三日冷官門炙手猶  
可熟先生聽我言事細不堪忽徙薪與去草此理同一  
轍勿謂草今無火過茅已茁

冬至春不雨元夕後一日雨作邦人甚喜

晴冬釀春溫氣候如濁酒我雖六塵清亦若醉一斗朝  
來天風雲高葉聚良久向晚等甘露數點斷還有逆遷  
萬瓦鳴飄瀟近牕牖鬱陶散襟懷秀潤入花柳出門聞

笑語蹈舞皆白叟指予西江水不可到南畝十日田無  
秧奈此家數口乃知天地心慈愛均父母吾儕拙於言  
額上但加手人窮詩或工肯為作詩否

久雨

山嵐變濃雲地氣洩冬熱急雨春風顛十日聲不絕舍  
中流水入牆外古溝咽塊然簷下雀狀若木雞拙我亦  
類禪定癡坐萬慮歇厨兵忽相報謂已糝藜蕨隨緣就  
一飽再看栢香熟

又

東君滋萬寶雨點無頭數窮巷一居深編茅四簷注風  
平江靜流山近雲低度州城杯斗小沒骭泥藏路遠望  
池塘綠似是春生處幽人本多睡麴藥仍相助陶然醉  
復醒鄰雞管朝暮

清明前風雨兼旬城外桃李無在者書室中有酴  
醾一鉗置之甚久蓋風雨所不及也為賦五韻

素質吐孤芳柔條敷瘦綠誰將刻楮手作此數莖玉園

林烟雨多百卉飛  
簌簌小室偶深靜  
花意猶清淑置之  
硯席間鼻觀常芬馥

廣南食檳榔先嚼蜆灰萋藤葉

萋作上聲讀

津遇灰藤

則濁吐出一口然後檳榔繼進所吐津到地如血  
脣齒頰舌皆紅初見甚駭而土人自若無貴賤老  
幼男女行坐咀嚼謂非此亦無以通慇懃焉於風  
俗珍貴凡姻親之結好賓客之款集包苴之請託  
非此亦無以通慇懃焉余始至或勸食之檳榔未

入口而灰汁藤漿隘其咽喉濯踰時未能清賦此  
長韻

海風飄搖樹如幢風吹樹顛結檳榔賈人相銜浮巨舶  
動以百斛輸官場官場出之不留積布散僅足資南方  
聞其入藥破瘡癖銖兩自可攻腹腸如何費耗比菽粟  
大家富室爭收藏邦人低顏為予說濃嵐毒霧將誰當  
萋藤生葉大於錢蜨殼火化灰如霜雞心小切紫花碎  
灰葉佐助消百殃賓朋相逢未喚酒煎點亦笑茶甌黃

摩挲絢子更兼取此味我知君未嘗吾邦合姓問名者  
不許烹鴈先登堂盤奩封題裏文繡箇數惟用多為光  
聞公嚼蠟尚稱好隨我啖此當更良支頤細聽邦人說  
風俗今知果差別為飢一飯衆肯置食蓼忘辛定誰輟  
語言混雜常囁嚅懷袖攜持類饕餮餐脣無貴賤如激丹  
人不詛盟皆軟血初疑被窘遭折齒又怪病陽狂嚼舌  
豈能鼎畔竊硃砂恐或遇仙餐絳雪又疑李賀嘔心出  
咳唾皆紅腥未歇自求口實象為頤頤中有物名噬嗑

噬遇腊肉尚為吝飲食在頤尤欲節酸醎甘苦各有臍  
偏受辛毒何其拙那知玉液貴如酥况是華池要清潔  
我嘗效尤進薄少土灰在喉津已噎一身生死託造化  
瑣瑣誰能汙牙頰

清明前三日將晚風電大作枕上賦此

寒雲壓初曉簷溜如飛瀑驚雷下簷來萬瓦鳴枯竹長  
鬚不敢卧起視亂雙目報言此何祥眾寶歸我屋細大  
同藟栗照耀比燈燭又如傾水晶一掃可數斛翁速共

羅取富者人所欲長髯爾何癡妄相堪捧腹降雹注大雨是豈誦不熟都緣春風老地遠孤花木瘴裏荔枝林東皇意寧足騎龍作清明雲間散珠玉

聞杜鵑

少年聞杜鵑不領杜鵑意朝將書卷開暮對春風醉啼急落花飛不廢書生睡年來聞杜鵑萬感集腸胃罪大畏斧鉞恩寬見天地桑榆寄晚日骨髓瑣深愧草舍燈火寒瘴鄉烟雨細休作斷腸聲孤臣已無淚

茉莉

嶺上老梅樹歲晚等凡木霜風吹枯枝曾有花如玉茉莉抱何性犯此炎暑酷琢玉再為花承以敷腴綠憐渠一種香徧歷寒與燠空庭三更月酒醒人幽獨有如高世士含情不虛辱時於寂默中至意微相屬鼻觀既得趣就枕便清熟夢中見靈均九畹皆芬馥

鄰翁以紫石斛承麤石一塊為予書室之奉斛蓋端溪之不堪為硯者然較以所載山石則勝矣予

是以有白鹿蒼壁之句白鹿蒼壁事見西漢書若  
乃忘真假遺美惡則予不知此石之與真山果同  
異哉

見山不見理真假析為二看假作真山細大豈殊致鄰  
翁憐索居奉我石一塊嵌空坐短小枯澀少堅膩承以  
下巖紫其體潤而細翁言白鹿皮蒼壁漸倒置慙慙加  
謝翁分別非所會但見眼中山屹立出塵外侵寒欲清  
癯向晚亦孤翠蕭蕭風雨天雲氣或冥晦雖無禽鳥聲

頗若巖洞邃側耳聽其中恐有隱者在

或問茉莉素馨孰優予曰素馨與茉莉香比肩但素馨葉似薔薇而碎枝似酴醾而短大率類草花比茉莉其體質閒雅不及也

茉莉天姿如麗人肌理細膩骨肉勻衆葉疑疑開綠雲小藥大花氣氤氳素馨于時亦呈新蓄香便未甘後塵獨恨雷五雖潔清珠璣綺縠終坐貧

雷五事見柳子厚集

焚香

五月黃梅爛書潤幽齋濕栢子探枯花松脂得明粒覆  
火紙灰深古鼎孤煙立翛然便假寐萬慮無相及不知  
此何參透頂衆妙入靜處動始定惟虛道乃集心清杜  
老句高韻不容襲餘馨夢中殘密雨牕前急

降真香清而烈有法用柚花建茶等蒸煮遂可采  
和相識分惠熟之果爾但至末爨則降真之性終  
在也

南海有枯木水根名降真評品坐粗烈不在沈水倫高

人得仙方蒸花助氤氲瓦甌鋪柚藥沸鼎騰湯雲熏透  
紫玉髓換骨如有神矯揉迷自然但怪汲黯醇銅爐既  
消歇花氣亦逡巡餘馨觸鼻觀到底貞性存

晚雨

連日午後雨勢欲漂茅屋雨從炎海來初不洗煩溽殘  
虹掛雲端落照明如燭舍中不勝困散步眺林麓渾無  
一葉動寂立類枯木徘徊傍西簷意頗不自足舉扇招  
微風送之入修竹

黎伯英解元贈予一大缶封泥如法初謂酒也至  
乃西山泉云暑中時可一酌珍重其意為賦此章  
有客渡西山泉源出山足初酌愛其甘既享不能獨汲  
取得陶罌置滿彭亨腹攜持若抱甕前致且勤祝是為  
清明淵可用洗煩溽珍重客此言其敢付僮僕新手注  
方壺尚帶蛾山綠我坐三生貧大嚼非所欲半世蒿藜  
腸兩飯惟脫粟豈無牢醴羶耻泰色身肉交淡況可新  
味厚實為毒願茲等甘露蕩滌糟與麴醺酣六經間作

我清淨福旁有教者云奢儉貴從俗下有龜蒙竈上是  
盧仝屋中置短尾鉚細煮茶花熟時可邀清風同餉一  
甌玉

黃暈征以石菖蒲一本相遺石圓而蒼小竅數十  
大率與蜂窠無異又類蓮房竅中皆菖蒲地也石  
生海旁俗號羊肚云

細腰結垂窠藏精事生育兒已傳翼飛孤懸尚憑屋水  
仙脫霓裳美實青如簇實盡秋房枯衆竅存虛目何人

得二物妙手夸神速摩搓小變之形在質為玉徐拾葛  
蒲子小大量其腹一種一根青有地皆充足浸以西山  
泉秀色遂可掬使我讀書舍涼意無三伏常若菰蔣中  
靜看江湖綠奉貺宜有詩所愧詩篇俗

即事

新涼到郊墟秋水滿陵澤主人坐輕舸恰受二三客入  
網旋烹鮮逢蔬方小摘甘同芡實肥酸分去聲石榴拆所  
欣情款親豈問坐席窄岸草度幽香退後金三尺風搖

水光綠照作杯中色沃此慷慨腸看朱漸成碧我今非  
次公醉甚狂不得眩眼既生花蒼顛先墮幘假寐便尋  
夢那知紅袖拍殘燭照歸時分破三月白

小飲木樨花下

東山有佳處修竹臨滄浪上下秀色中木樨寄孤芳玉  
露後叢菊先作萬蕾黃置之婆娑杪金釘澹熒煌或云  
仙人醉披披綠羅裳隨此小珮玦散落天一方我來便  
酌酒是否那能詳但怪秋山老猶有幽意長哦詩未得

詩已照明月光樂哉徑酩酊知在夫何鄉豈非化蝴蝶  
以夢棲其旁明朝整冠坐開卷書亦香

山齋霜寒

山齋僅容身寒到不嫌窄小牕壓茅簷虛靜自生白寂  
寥賢聖心顛倒文書冊限以一簾垂中外塵事隔時於  
高樹杪野鳥翻凍翮南方得此冬天用享孤客祇恐明  
朝晴復作三春色長橋楓葉落終有吳江憶

索酒

奴僮爾趨勿遲久去省餅中有餘不毋論多少速攜來  
我已持杯先在手長年燠熱類炎夏今日寒風透牕牖  
籬邊黃菊帶清露沙際疎梅似初有嘗臨書卷問古人  
教我真筌如一口不須辛苦學餐霞但祇開懷多食酒  
時有教予吐納者  
食酒見于定國傳

對菊

淵明不可作遺芳落天涯幽香挹孤蘂正色敷金蕤眷  
言出俗韻寒透方相宜南方十月溫不見落葉飛江氛

與嶺侵負此傲霜姿向晚過微雨月波湛明輝風高便  
覺好獨酌臨東籬對之不須寐要着清露滋

有客致木綿椅坐為山齋之用

桃歇冬花蕉葉乾寒到廣東真是寒山齋竹椅冷如水  
欲以薦坐無蒲團鄰翁未必藉華纈顧此流落心所憐  
臨溪汲水下藍碧為染吉貝已木綿長針引線作方衲  
軟暖厚薄無一偏雖是凝塵少來客瘦骨整衣身獨便  
領君此意覺溫甚我亦虛坐其敢安家世窮愁豈今日

廣文之老先無疆

庚午臘中苦寒不雪不雪嶺南之常而苦寒為希

有矣

簷風動修竹終夜玉相戛曉望山頭松孤瘦凍欲折欣然掃茅亭準擬看飛雪待之既踰時脚硬冷如鐵青山全不老暮雨空淒絕豈非地氣偏濕濁舊不泄翦水下雲來祇向虛空歇今年臘中寒萬口稱凜冽此是雪先聲蕩洗嶺南熱蜚蜚且莫驚造化無差別會須煙瘴林

都有琪花結草色潤如酥看取焦枯活

辛未元夜

輕寒擁山城遠綠生春草迎神樂元夜笑語聞蠻獠惟  
有團圓月報我時節好寸燈豈為孤卮酒未為少微醺  
短檠旁人靜茅屋小

竹間孤坐

遠竹竹自如親竹竹不可移床向前軒與之相並坐受  
日一心虛搖風萬塵破忽作雪牕聲斷雲疎雨過

閏四月夜草亭獨坐翫月

山城向中夜暑氣亦漸歇幽蛩互喧靜飛螢亂明滅清  
風開竹杪入此半軒月坐久觀我身不見煩惱熱天邊  
白玉盤只恐有時缺頗思得詩句頌道好時節著意搜  
萬象萬象無一說

擬州學橫翠軒

太華帶雪千丈寒砥柱中流萬夫愕未教聳翠入青蒼  
故對書牕且橫著平鋪秀氣一里許不露雲尖與山脚

何人半破好東絹畫出瀟湘秋色薄

無俗軒

軒前疊小山山下生新竹秀色逗幽光都作軒牕綠  
公來坐其上更置一株玉岸巾人亦涼意飽不須肉落屑  
隨飛香是中安有俗

讒桃花

手提銅壺汲漣漪去年曾浸寒梅枝今年汲水浸桃李  
明玉之瘦紅粉肥天天灼灼豈不佳如酒透骨春頗宜

孰與山齋雪將飛  
彼孤者芳抱清姿幽香入我苦吟筆  
此意似非挑所知  
我今顛倒六鑿癡對花下悟靈雲疑  
何人道眼絕世態試以公論分妍媸  
東鄰有女厭綺縠  
雷五不簪珠與璣

寒食

江鄉時節逢寒食  
花落未將春減色  
嶺南能有幾多花  
寒食臨之掃春跡  
花多花少非我事  
春去春來亦堪惜  
柴門風雨小庭寒  
無奈池塘煙草碧  
欲將詩句慰窮愁

眼中萬象皆相識欣然應接已無暇都為老來無筆力

遊西山

我來西江邊兀坐閱寒暑水外有嘉處欲往輒阻昨  
朝主人間睽轡臨洲渚開船入江雲絕渡不須櫓杖策  
徑登岸騎從單可數松杉生好風導我綠陰舜迎門野  
僧踈對佛香爐古峻上百級棧竹屋亂撐拄旁道得小  
徑窈窕通深塢石蘚布青錢巖泉迸飛乳幽蘭隱高人  
孤芳秀寒女樹靜忽啼猿林密疑藏虎春半果如秋空

翠元無雨蒼崖隔桃花不可至其所但聽葉間禽似與  
秦人語不會武陵溪端的在何許徘徊聳心骨感歎就  
尊姐翹藥驅我醉豈復更爾汝一笑諧真懼萬事落塵  
土謂已脫因拘天矯升洞府顧茲懼與適天暫慰孤旅  
此身當有累未是得輕舉驪駒已載歌蘭棹倚前浦中  
流望林泉隔岸聞簫鼓上馬向柴扃山際玉鈎吐

客惠賓州竹簟甚佳取退之鄭羣贈簟詩讀之數

過成古風云

卷送風漪光八尺竹新漸作琉璃色世人貴耳便賤目  
那知不抵蘄州笛年來愧汗常浹膚夏日自嫌汗枕席  
有時追誦法曹句悵恨宗人不多得山齋置榻客一身  
君惠清涼到心骨門前客至莫見嗔老子解衣喧鼻息

偶題

軒前有修竹穿紙入牕櫺清風動搖之壁間影縱橫軒  
後有修竹山花依以生幽芳吐孤艷不與翠色爭愚翁  
坐其間萬慮蠢不萌不識動與靜但覺懷抱清千古愧

張籍眼明心已盲

白蓮草亭前盆池所出也慣見紅華忽遇此本孤  
高淡素有足愛者衆皆以比婦人而予獨以擬顏

子云

鮫人織綃已奇詭輕梭引絲不濡水何為玉人雕琢玉  
亦在泠泠水泉底截肪磨玷既成花益以青銅聳而起  
體色當從太虛來五采世間俱一洗似云嫦娥醉步跌  
誤墮汙渠出清泚又疑驪山妃子泉老藕拔根浮到此

華清宮白蓮湯以玉石鑄半開蓮花湯自蓮葯中湧出  
妃子浴則坐花上但不知今所存果開元時故物否也  
斯言謾誕何足稽况乃窮鄉寧有是我聞賢者在泥塗  
其涅不緇豈無以外觀不逐紛華遷虛室常隨吉祥止  
心齋自厭葷酒肥坐忘盡黜青黃美薰然蓄積為德馨  
表裏絕塵無與比黃昏陋巷風雨寒細看豈非顏氏子  
道者察成人為書額擬成一詩

察額高懸太守書方盤炯炯連三珠唐賢正筆久寥落  
柳公權謂心忽此相遇南海隅是察今雖茅草新原是  
正則筆正

東鄰寒士居士貧更在玉川上三間破盡四壁無我借  
得之稍營葺灑掃共費十日餘竹牕掛處青山入水色  
坐照髮與膚焚香下簾百念靜雖未得道道不殊假道  
為名亦道者竊復慕道名豈虛風流閒暇兩轡朱筆含  
墨光能卷舒醺酣為我小飛動到紙先有神鬼扶我身  
漂零秋葉孤短景日就桑榆枯願憑大刻消百癘呼吸

瘴霧同醺酣

小說顏魯公字通瘴

白居易有望闕雲遮眼思鄉雨滴心之句用其韻

為秋思十首

積雨蕩闌暑一涼纔有望  
夜氣入燈花細影搖書幌  
楓葉飛紅薄夢到吳江  
上孤笛過蒹葭鱸魚出烟浪  
覺來空惘然猿子啼青嶂

頃隨千官羣曉入丹鳳闕  
侍立近金爐下殿香未歇  
宮槐零露清馬穩寧憂蹶  
日近長安遠福過難辭拙  
聖主骨肉恩孤臣眼中血

天高不礙眼矯首見堯雲  
况復烟霧清八荒靜無塵  
垂

空不可狀變化何輪囷遙知五色光上下藏北辰我今  
在人世悵望那得親

涼至欲飲酒此興不可遮手提皤腹罌傾之若流霞可  
但飲文字搜尋到魚蝦忽焉見妙理眼亂皆成花方知  
水底眠杜老言不誇

天邊定何物洗此瘴鄉眼初如黃金盤便似白玉碗明  
河注其中無處光不滿舉杯對之飲萬慮覺蕭散竹風  
吹我睡不得終夜歎

西風催戶西落葉動相思  
栢香穿石鼎孤起學遊絲  
簾垂草亭靜籬菊弄幽姿  
萬物同一氣榮悴只如斯  
哦詩詩未成覽鏡添霜髭

南方秋不悲奈我居異鄉  
不見楓葉丹但憐菊花黃  
掃迹燕如客斜書雁成行  
夢中清愁闕云此是瀟湘  
瀟湘連洞庭何處是東陽

憶昨離帝都一別遂如雨  
莊舄雖不病亦作越人語  
茅屋終夜寒單衣晝還暑  
荷葉未全蛀桃花已微吐  
西湖

蓮藕香今也在何許

日落紅練淨山近空翠滴  
爭枝鳥未棲閉戶人先息  
孤坐明月中寒光入胸臆  
衣潤毛骨冷萬劫塵土滌  
誰知茅簷下我獨對姑射

老松成偃蓋瘦竹抱虛心  
清風度其中瑟瑟韶蕩音  
聽之遂熟寐飄然歸故林  
三洞既微欵赤松亦幽尋  
高樓訪沈約四牕桐葉陰

風俗

民生各異俗王制論不詭惟茲封州郡山之一谷爾麥  
秋無青黃霜冬有紅紫嗜好既殊尚言語亦相抵問之  
彼不通告我此勿理駭去如麋麋團聚若蛇虺已而忽  
超然天下同一理嶺南自嶺南勿用嶺北比况自江山  
情雅故均鄰里暮夜松桂間受月如受水根根抱虛明  
葉葉萬塵洗先生一杯酒月到酒尊底畫以寄吾鄉吾  
鄉祇如此

靜獨

飲酒或濡首作詩防嘔心疾走欲避影不如常處陰階  
前享明月但鼓無絃琴清風儻相過付之修竹林一靜  
服羣動萬緣寧我侵

壬申年封州自正旦雨至元宵不止

人圖作元夜翦紗累紅蓮天欲下膏澤萬瓦飛流泉燒  
燈雨何損不過市井喧春若無此雨從誰覓豐年癡兒  
騷女臨管絃見雨不止意缺然百千燈光祇照夜山下  
一犁知幾錢人間萬事有輕重况是作止當從天

趙子禮勸農田有詩和者盈軸然皆頌德詩非勸  
農也擬和一篇

山鄉窮甿不知春鹵莽之種那復耘勸使一日臨郊垌  
曰爾父老爾勿寧勅書勸諭因人情要使秋稼如雲平  
饋爾飲食煩厨兵爾醉且飽其力耕麻麥荏菽非一名  
農有農事毋虛稱齒草羽毛上勿登貫租但議頒殊恩  
自今無問陰與晴扎扎聽爾耨鋤鳴

柳子厚有扎扎  
來耜聲之句

又

山田磽薄高低春田者緣山嗔鳥耘情農不趨林外坵  
每以憚此求暫寧守出見之告以情爾輩勿視米價平  
官今不用農為兵雖屢豐年自當耕醉飽酒食爾有名  
田畯至喜非肇稱衆曰此亭公所登願當去聲甘棠頌公  
恩初初之雨明日晴聽我吹幽擊鼓鳴

良嗣壬申年來為生朝壽作一詩荅之

惟吾始生朝汝祖五十八甫及賈誼少祖易大夫簣懷  
綑至不天能有幾歲月不得著斑衣慘慘意常缺吾如

汝祖年汝已雙髻茁似我蒲伏歲汝万事紳笏我更得  
祖壽尚有十年活汝之事親日加我一陪閣其如父與  
子灾福勢相軋災勝福力微萬罪如箭發向非天地恩  
誰肉兩軀骨後效皆渺茫前愆正磨刮今茲各天涯瘴  
水東西隔汝作飛雲感我類寸腸割天之加汝者如與  
復如奪每見榴花紅為汝惜時節手持祝生香自向爐  
中爇但願早團圓盤餐共麤糲將此離別數造物為除  
豁小寬寒暑期未作枯木折

夜聞雨聲賦古風時趙使君祈雨之翌日也

山齋道人夢魂清夢中細響忽可聽  
三峽流泉出幽隱  
萬蠶食此春葉聲又疑相如夜病渴  
蟬眼亂沸石鼎鳴  
呼童起視果安在云是四簷甘雨傾  
于時火流祇三日  
田北正作龜縱橫昨朝太守拜壇下  
五龍奉命雲雷驚  
小兒放散蜥蜴去神鼓罷擊巫舞停  
田翁翻溝出賸水  
婦子田邊笑相迎商量今歲多釀酒  
是間指日當雲平  
山齋一飽想無慮摩腹卧看秋風生

癸酉中冬四日江行

新寒蕩餘暑小雨結離愁行人向西去江水自東流我  
起孤船歸田腸車萬周假寐槳聲中清夢何悠悠恍若  
傳兩翼飄然得浮遊仙風入山骨佳氣遮林邱塵外人  
物古雲間樓殿幽自念此何許而容區中囚旁有老人  
笑謂予失初謀貪前慕垂餌遂為香所鈎今茲窮瘁身  
抱病炎荒陬終歲骨肉念百年離合憂俛默事迎送嗟  
嗟亦良羞予欲從之拜江波拍船頭危坐記惝恍熏心

省愆尤玉玷容可磨水跌那許收

自訟

我昔貧時冬少袴四壁亦無惟有柱自從蹈官職場  
暖及奴胥妻子飲線因針入敢忘針入室古云當見妬  
雲衢跌足泥淖寒涕泣牛衣復如故銜恩省咎到骨髓  
萬罪一愚難自恕山深坐覺困煙瘴天濶日思沾雨露  
性中不愛賓客詩亦或未然工部句文章誰謂不得力  
陋儒豈是冠相誤

郡治西廳錦被花不為治架每花開覆地而紅或緣他木以升予分其本植草亭之東家僮相與栽木於地高七尺許上布圓竹復破竹交加之外出四簷如屋之狀通小牕側戶以窺視而出入餘皆花地下置一榻一几可以獨酌作詩以記之云

栽花傍庭砌立木為花屋小戶虛一偏橫牕置其腹分竹接柔蔓尺寸引勾曲春工直解事夜雨頻澆沃枝條日滋榮滿架籠新綠紅淺暗香深揖遜薔薇服此花名

錦被覆我四圍足比之公孫布豈不堪華縟自慚流落  
人尚此享癡福我欲飲其中亂影交醺醪擁被即長謠  
傲枕眠清熟又欲效王勃醉處先磨墨引此畧覆面腸  
胃成機軸染筆起臨風定作花芬馥

王勃每醉先磨墨  
數升引被覆面覺

乃為  
文

### 米盡

米賤今年不論錢雀鼠饕餮人留殘青蚨不過百枚去  
可得明珠一斗還其如客寄已淹久羞澀囊中無可看

今朝欲寫魯公帖四顧門外將誰干經營薄少置廚舍  
呼童告使知艱難從今且作淖糜計雜以山芋供兩盤  
嗟予是身亦老矣造物未置飢與寒何當甌炊七寸粳  
飯香及處皆同餐

北鬱單越之國粳米長七寸火珠熟之飯香所至人皆來食事見嚴經

### 春雨村居

茅簷竹屋吹山風兩山流水環西東如閉篷牕小舟坐  
四面煙雨春濛濛塊然擁被看周易炯炯萬象羅心胸  
瓶罌所容可半斗妙理盡在皤腹中

杜牧詩皤腹瓶罌古

明朝晏

起寒庖空市小米賤升斗豐攜籃挑薺奴勿慵熟煮爛  
糝供乃翁

園中錦被花始開一枝紅白二色趙守以二詩見  
報依韻荅之

兩種色一枝花何郎汗湯餅妃子醉流霞寂寥難伴山  
齋客風味宜歸太守家

又

機上紅江頭紅其織其濯皆春風平鋪豈是寶刀翦怯

日尚用輕煙籠何人不置芙蓉帳置向山園寂寞中欲  
尋詩句贊天巧亂醺秀發詩不工一枝和露奉明妝知  
我陋室非所容果然花去玉為報瑣細換得光玲瓏頽  
然只擁公孫布曉枕不知傳鼓鐘

出江

四岸出前江開帆破浪何必春水船而後始天上一  
家五年別萬里遠來訪自聞櫓聲近延首日顚望今朝  
兩相即悲喜不可狀牽衣小兒笑叙事老妻愴一杯藜

藿羹敢謂復同餉地氣既踈泄山居亦清曠米賤不愁  
貧時和定無瘴相與戴君恩形影且依傍惟憐囚罪身  
此去幾時放欲以問白鷗白鷗波浩蕩

南方諸州惟山  
逼江遠者瘴重

蓋地氣  
不泄也

又

隨緣禽在籠觀道蟻旋磨忽此作江行開牕得虛坐回  
首城邑卑極目天地大千山雨後綠瘴烟不敢浣古木  
猿數枚野渡僧一箇蕉心黃漸肥荔子紅欲破淨練鋪

其中到底只容拖烟消日乍出四顧無所唾退之云緣  
淨不敢唾  
隨行欠王維筆墨願借過收作小圖畫素壁時橫卧

### 大暑竹下獨酌

新竹日以密竹葉日以繁參差四牕外小大皆琅玕隆  
暑方盛氣勢欲焚山樊翛然此君子不容至其間清風  
如可人亦復怡我顏黃昏開竹杪放入月一彎綠陰隨  
合之碎玉光爛斑我舉大榼酒欲與風月懼清風不我  
留月亦無一言獨酌徑就醉夢涼天地寬

閨門詩三首

幽思春雲亂擬向琴中說  
薇寒錦薦高未鼓絃中絕  
尚有無絃韻或可奏明月  
階前望冰輪去去不停轍  
薄命如妾何秋風河漢濶

無心事鉛黛采采菊金黃徘徊欲寄遠  
雲夢連瀟湘豈不懷君子念念不敢忘  
西鄰擊神鼓東鄰鬧笙簧三嗅籬邊英  
淚落秋風香

晨光入幽戶手織回文書聞古有雙鯉  
為人致區區書

成立江邊天寒渺無魚微懷既莫致慘慘何由舒歸來  
更無語悵望庭花踈

正月十一夜燈開雙花

鉛杯壓短檠清膏沃虛草炯炯孤焰瘦吐此雙花好誰  
為夜氣溫暗助春風巧碎翦朝霞紅緣以金粟小或云  
兩玉蟲飛來抱釵鈔美人輕燎之要省火中寶我聞道  
家和可以感穹昊門闌將有喜每事吉先兆而我方朽  
衰負戾落南嶠胡為今夕光熠熠似相報無乃天地慈

四海施洪造陽和隨根性溥為脫枯槁  
吾其得歸歟頂戴君恩老



北山集卷二十一

欽定四庫全書

集部

北山集卷二十二至  
四

詳校官庶吉士<sub>臣</sub>柳邁祖

主事<sub>臣</sub>呂雲棟覆勘

總校官降調編修<sub>臣</sub>倉聖脉

校對官助教<sub>臣</sub>卞維吉

謄錄監生<sub>臣</sub>朱繡

欽定四庫全書

北山集卷二十二

宋 鄭剛中 撰

登嶽麓法華臺嶽麓兵火後寺已兩創惟臺為舊  
物當時住持鄰道者物故二十年矣

湘西嶽麓法華臺四十年中又再來惟石與松如雅故  
問僧并寺已塵埃區區獨恨恩難報負負無言志已頽  
退宿道相愁不寢四簷春雨雜驚雷

投宿蒲圻縣

咫尺蒲圻縣泥深路屈盤  
小橋飛雪急破帽蹇驢寒  
家信無人寄愁悵賴酒寬  
轉坡聞有寺一榻借偷安

初至法會

正媿修途煩僕馬忽投幽寺息塵埃  
杜門隻影惟便靜  
覽鏡雙眉未忍開  
春色更兼山色好  
雨聲常帶竹聲來  
呼童起視楹中物為爾愚翁進一杯

乍晴

幾日春山雨作霖  
曉風端為破重陰  
登樓物色渾如畫  
倚檻情懷未易吟  
萬里斜陽鳥飛去  
四圍煙樹客愁深  
箇中定有超然法  
趺坐端須仔細尋

十月初夢寄良嗣詩三句云相思一載餘身隨雲  
共遠夢與汝同居覺而足之

武昌分別處江岸倚籃輿  
對飲三杯後相思一載餘  
身隨雲共遠夢與汝同居  
何日秋風夜燈牕聽讀書

口占

僧房花木疎鳥雀下庭除氣候爭寒煖春光半有無  
四山雲外瘦一塔雨中孤誰用詩人筆收將好畫圖

未至鼎州道旁有甘泉既酌泉過松竹百步投宿  
小寺翌日又酌泉登輿松竹間蘭香甚盛感而賦  
之時自移封

一宿招提又裹糧寸心孤影自匆忙客從瘴嶺暑邊過  
蘭在幽林深處香動靜於人曾兩意升沈如夢亦都忘  
但悲垂老恩無報淚眼瞻依日月光

予嗜茶而封州難得有一種如下等修仁殊苦澁  
而日進兩杯

一瓢方此寄天涯用巧居貧拙有加晚食正為顏觸飯  
空腸却嗜玉川茶長髯亂磨輕於土短尾濃煎不見花  
撐拄可堪書卷少空教癯瘁髮生華

岳陽道中

客子方憂畏津亭更寂寥亂雲藏野寺積雪覆溪橋米  
潤還難買酤遲轉不饒梅花有何故冷笑背寒條

旁有酒肆終日

不售予往沽之倍貴謂  
予無占位牌詐官也

即事

可信南方氣候溫冬寒未退已飛蚊庖霜豈復冰魚膾  
翦雨定無春韭根向晚孤城人寂寂閉門幽夢酒醺醺  
起來欲向寒梅說一見眼明惟是君

故居

北山三十里憶得舊書堂小徑通蔬圃新醅壓酒牀晚  
涼荷葉嫩細雨橘花香此夢今何許隨緣又一方

元旦二首

傍城山曲處草徑一居幽  
元夕孤燈裏殘香靜夜頭  
久晴無苦冷獨坐祇清愁  
也擬尋詩句吟哦醉却休

正月燒燈夜封川轉覺幽  
十分憑月色數點照城頭  
俗習那知陋安陵諒不愁  
家家松火畔春米未曾休

人家大率

每夜無燈遇春  
確則然松明

春熟

地氣冬來不復藏  
桃花都向臘前芳  
無寒疑是青春老

耐靜從他白日長  
野蝶舞餘還自去  
沙鷗飛斷却成行  
迎風儘著單衣坐  
淨几留心看藥方

即事

晚來登眺處  
寒煖正爭春  
城古亭臺少  
門嚴鼓角新

趙守

新建譙門

江山真是好風俗  
不妨貧克已從清  
約須知太守仁

憶昨

憶昨少年日  
家無斗粟藏  
銜杯須徑醉  
得意必真狂  
老去惟思睡  
年來祇念鄉  
幽齋誰共語  
看徹篆紋香

久雨

漂泊初時尚念鄉如今意定已都忘小牕積雨常編潤  
慢火薰籠藥裹香正要門前蛛結網何妨籬上蟻成行  
山前春雨非常好出鉢應須飽十方

有客問予每日何事客退賦此

杜門管得酒瓶乾餘事誰能著眼看髣髴殘香幽夢斷  
冥濛細雨落花寒林梢寺隱孤鐘晚水外人喧社飲懽  
萬里一身聊爾耳此生惟覺上恩寬

封州大率園不蔬人采小蓼食之葉尖而細號尖  
頭蓼亦謂之辣蓼誤食往往殺人又春水肥時河  
豚魚極賤二物郡人所酷嗜也作詩自戒河豚本  
草一名脹肚魚

遠地窮鄉口腹殊居然孤客莫隨渠路旁施采尖頭蓼  
江上爭尋脹肚魚野葛可嘗雖是慣馬肝不食未為疎  
此生餘日皆君賜饘粥充饑自有餘

吾鄉城外北室宛轉皆亭園自北門外南徹浮橋

最為遊春勝地因清明念之賦此

短牆疎竹小園亭記得東風嫠女城久醞菖蒲催被褥  
半肥梅子待清明橋邊沙印驕驄跡水外花藏醉客聲  
年少不知身解老曾將豪氣與春爭

茉莉

小鋪移根帶蘚苔暑中相對亦佳哉素英吐處祇如玉  
清思牽人全似梅淺綠翦羅和葉看真香擣麝逐風來  
觀君可與酴醾並高士寧容俗子陪

或謂茉莉花帶葉而香可比酴醾故

有是

句

西鄰桑間有隙地從可五丈其橫五分之一荒蔓  
瓦礫之所聚也鄰翁借予栽竹因賦之

荒園茅塞閉牆隈多謝西鄰借我開力課頑僮移斷甃  
小通幽徑養蒼苔種雲無處容檜木遮日聊須買竹栽  
十畝故鄉松與菊不須便望主人回

民入錢抱債公庫東塘決水取魚甚盛漁翁謂抱  
債者販婦則旁午於塘上者皆婦人也

積水翻深畎輕舸徧遠灣  
鳴榔時撥刺挈網亂攔販  
婦貪趨市漁翁喜動顏  
輸他鷗鷺飽煙際不勝閒

封州

莫道封州是小州  
封州雖小客何愁  
荔枝受暑色方好  
茉莉背風香更幽  
得醉便眠尋夢蝶  
欲行還立看沙鷗  
向非造物曾留意  
誰把餘生為我謀

五更醉卧

獨坐前軒引破觥  
滿牀書卷任縱橫  
明蟾自可當燈燭

修竹便為佳友生  
眩眼添花知輕醉  
小牕歌枕夢春耕  
日高推被還思起  
聽得厨頭有菜羹

栽竹

信緣移老竹  
觸暑種瓜根  
小雨回生意  
蒼苔覆斷痕  
影還隨舊葉  
涼已到清尊  
相對如佳友  
何妨儘閉門

閒中

須知造物有恩深  
遣我閒中見物心  
掠水高低鷗自在  
過花先後燕相尋  
門前父老忽聞語  
種罷今年常值陰

秋熟甕頭添釀酒異鄉孤客與多斟

哦詩

怕醉還思醉哦詩未得詩過雲飛雨急斜照晚涼遲嫩  
綠開荷葉新紅入荔枝躊躇搔髮短倚檻立多時

時官多以封州俸薄井邑蕭條居處湫隘為歎觀  
如聞而賦之

相逢都說在天涯祿似蠅頭舍似蝸畫角樓前皆郭外  
虛棚竹上是人家草深正恐鹿為虎日暮漸迷鷗與鴉

老子豈知差別相高眠飽看荔枝花

幽居

蠻徼分來氣未清江風吹雨瘴烟腥  
出巢燕老榴花落抱樹猿啼荔子青  
人客漸稀真省事古賢相對可談經  
瓶中況是無多酒更把柴門著意扃

偶書

帝恩容貸比天寬天見孤臣涕淚潛  
數日得看書半卷一身猶占屋三間  
團團便是故鄉月疊疊只如東越山

第引滄浪澡心骨  
堯雲終自不違顏

重五

異鄉逢午節  
卧病此衰翁  
竹筍迸新紫  
榴花開小紅  
山深人寂寂  
氣潤雨濛濛  
煮酒無尋處  
菖蒲在水中

又

記得山居暑服輕  
石榴低照酒尊明  
綠茸花裏占詩句

角黍盤中脫錦綳

浙人重午以竹箬為粽

老去容身惟有睡  
午宜

採藥懶能行  
謾令門外簷蒿艾  
且免炎鄉瘴癘生

夏夜用人韻

散員居事外罪籍比刑餘敢歎山樊熱惟驚歲月除城樓傳漏遠河漢曉星疎兀坐窮清景明朝曉看書

元信昨日惠八桂酒兩尊今日惠蓮數頭實圓而大云盆池中白蓮子也

盆池初泛小青錢俄有盈盈淡佇仙香老不隨明玉墮子肥爭露寶珠圓乍披紺色神都爽欲擘柔房意尚憐檢點朋尊亦新貺心知無報且陶然

夏夜小雨獨坐

杜門惟一靜夏日不知長  
竹下小牕暗燈前飛雨涼  
棋低無對手飲少信中腸  
此意此時節尋眠未用忙

經月門無客客至必謂予此居蕭然如僧舍

東望麟山聳若幢碧羅盤曲注西江  
隣家蜜滿蜂臣分屋角窠成燕子雙  
門設雀羅遮坐客燈排金粟照書牕  
須還住處如僧舍拄杖挑雲到此邦

閒居常自足

閒居常自足，謂欠亦誰增。  
辟穀知難學，餐霞豈易能。  
菜

非饕地主米，不恩隣僧白。  
日惟扃戶黃昏，便點燈。

地主送子

美菜鄰僧  
送盧全米

黃纛征惠石菖蒲既賦古風復成四韻

附石菖蒲誰手種，形模姿色妙難如。  
黃蜂變去惟窠在，綠玉抽來祇寸餘。  
夜為露華離几案，曉添竈井向堦除。  
如何便得生秋意，更欲中間置小魚。

初秋

包飯腰鎌洞戶忙  
芭蕉葉底稻田黃  
微風有意回關暑  
小雨頻來作夜涼  
煙際輕舟分霽色  
望中飛鷺點山光  
初秋便自宜孤客  
鄰舍數家都酒香

秋夜聞雨

海風吹屋亂疎更  
花結燈昏背短檠  
暑避新涼知有漸  
酒扶孤夢未曾成  
滿簾都作芭蕉響  
四壁時兼絡緯聲  
曉起茅簷落餘滴  
爐香癡坐不妨清

讀杜子美三大禮賦

牢落長安賦就時青苔到榻有誰知年踰四十猶無祿  
筆下千篇祇有詩風雨飄零長是客干戈悲梗獨憂時  
平生愛作驚人句博得如今杜拾遺

闌暑

闌暑秋郊暮前山瘴霧中猿獠都下飲鳥雀未歸叢弄  
影試新月披襟招好風銀潢向何夕零露濕梧桐

秋夜山居

路轉城西一里餘不妨山徑自崎嶇四鄰酒熟人常笑

萬木秋深葉不枯，空翠入牕濃欲滴。  
夜涼扶月靜尤孤，有時雖是風翻屋。  
賴我元無屋上烏。

重陽太守招登東山以腹疾不能赴

卧對佳辰兩鬢斑，幽憂深閉屋三間。  
芑能去濕方摩腹，菊可延齡少慰顏。  
骨瘦免教先落帽，酒行無分作頽山。  
遙知太守登高處，座客詩成燭影間。

相識有遺予以紫石硯者，謂是下巖石，名曰玉斗。  
予自湖南再轉之嶺，畏行李重滯，舊所用委棄不

存正以無硯為窘得之喜甚且愛其名捧而戲之  
曰亞父後爾尚無恙耶為賦此

眼如鸛鵒色如肝此語傳聞謾有年李觀匣中方念往  
范增撞後豈知全臨池欲試曾親滴把墨重看未忍研  
何幸却同柳筆句貯雲含霧到封川

柳子厚謝楊尚書  
寄柳筆有貯雲含

霧到南  
溟之句

鄰翁以黃菊一本見贈是歲冬暖梅已成蕾以四

韻戲菊

鄰翁情鄭重贈我小金錢  
半鋪開蒼蘚全根帶曉烟  
數花浮酒面三嗅種籬邊  
舍北疎梅近馨香更勉旃

哭潘義榮二首

沈約樓前落葉黃朝來玉折報潘郎  
一區每嘆如懸磬三版俄驚戒若堂  
泉石半生閒日月絲綸餘事入文章  
但應祇有凋零恨鴈盡雲空不見行

公六兄弟相繼物故至義榮而盡

少年聯轡入京華闊步超羣便起家  
親覽聲名高漢殿憂時踪跡僅長沙

公頃自司諫出監汭口稅

藏刀所在留餘刃懷璧

終身不見瑕老眼看公春夢散不勝哀涕落天涯

晚望有感

霜作晴寒策策風數家籬落澹煙中沙鷗徑去魚兒飽  
野鳥相呼柿子紅寺隱鐘聲穿竹去洞深人跡與雲通  
鴈門踦甚將何報萬里堪慚段子松

客至木綿坐已為長韻又成四韻

就溫嫌冷性同然況是冬深凜冽天莫訝塵生楊綰席  
都緣坐少席文氈感君四坐平分暖為我長針細衲綿

從此門前有來客不須稱遽足留連

庚午冬至夜

今夜雲開北陸風  
丈三將到土圭中  
剝窮誰見陰陽妙  
來復方知天地功  
孤坐看燈渾是夢  
蒼顏被酒不生紅  
却憐土俗追時節  
言語雖殊意亦同

衡嶽左右道旁茅舍竹門中有老人八十一歲宣  
和間嘗為蕪湖尉因官火棄官寓湖湘無生涯學  
者時過之間經義遂相資助皆自言如是予飯其

旁飯已即行馬上擬成

茅舍柴門畫亦扁松姿鶴骨向人清  
閨門饘粥千金重九品冠裳一唾輕  
仁義到頭馬用稼聲名真是豈其卿  
我慙瘦馬衝烟雨不得從容慕老成

自憐

木偶漂來萬里身自憐藏拙向三春  
人窮但有哦詩債意懶終無下筆神  
屋後雲深雞失曉厨中飯盡鼠嫌貧  
五更小雨却堪喜數壠寒蔬色已新

春晝

深村春晝永事事不相關  
花少蜂蝶瘦水清鷗鷺閒  
香熏紙帳竹枕傍屏山  
付與翛然夢樂哉天地間

頻夜燈花顧予有何喜  
其可喜者又心之所自知  
不待燈報也

何煩喜事燈來報喜事  
山間足可誇綠竹乍移都出筍  
素馨衝臘小開花疎牙送飯匙  
猶健細字抄書筆有加  
况是山前膏雨足平平春水浸秧芽

草亭假寐

菜畦深處短牆西中有茅亭客未知  
天許病身全得懶  
日烘春困恰如癡  
壁間花影簾休隔  
案上書篇燕莫窺  
更語東風輕過竹  
老夫假寐一些時

涉園偶成

顏齡正是投閒好  
膽薄誰知與拙魚  
棋信天機那論失  
酒隨客量不教添  
靜衝小雨看花蕾  
時撥蒼苔候筍尖  
幽鳥葉間如有語  
比翁難作逸羣髯

懷舊

家近西山雲滿籬  
曲塘深處艾荷稀  
雨餘燕向花間出  
飲散人從竹後歸  
炊到麋粳真是窘  
食他糠粃不知肥  
半生享過清閒福  
回首兼除事事非

去冬

去冬竹瓦迎新雪  
曾下珠璣到酒盤  
正月便回春意暖  
五更微帶鴈聲寒  
門諳寂寞何須翟  
鬢就衰殘豈是潘  
祇有報恩心耿耿  
自餘都作六如看

是身如夢幻  
泡影露電

夜坐

靜坐始知閒有味，懶行終是病相侵。  
雨聲歇處亂雲薄，月影來時清夜深。  
幽蛩傍堦如有話，蟠罍在手更孤斟。  
寥寥萬古聖賢意，落盡燈花空寸心。

晚涼小酌

城頭暮角送闌暑，倚檻頃之風滿襟。  
去鳥漸迷山落日，鳴蟬忽靜木垂陰。  
弄雲初月光猶淡，出水新荷綠未深。  
蕭散晚涼君解否，一杯尋見古人心。

山齋疎陋每焚香  
旁舍聞之而齋中不甚覺  
蓋香隨風以流也為四十言

聞時清透骨聚處細成縞  
灰厚火得所山深風奈何  
四牕都紙破比舍得香多  
利彼與自利吾心寧有他

寒意

嶺南霜不結風勁是霜時  
日落晚花瘦山空流水悲  
棲鴉尋樹早凍蟻下牕遲  
季子家何在衣單知不知

循省

就居栽竹暮清幽繫係其如是楚囚高枕亦成驚枕夢  
小牕長作客牕愁捫心罪在愚臣戇肉骨恩歸聖主優  
日有省循千點淚臨風分付與江流

臘月十三日送邢婿還鄉

鄂渚分攜驚昨夢如今豈謂一尊同塵埃萬里玉常潤  
風雨對眠床亦東問得平安歸客子留將思憶與衰翁  
征衫瘦着不須遽漸向湖南春色中

辛未除夜

爆竹懶能熏桃符又上門老身迷歲月春色偏乾坤桂  
嶺家何在茅堂酒滿尊小籠溫衲被清夢接黃昏

壬申年封州自正旦雨至元宵不止

江漲侵山雲不乾迎春送臘雨霏霏勾萌潛識化工意  
泥淖莫嗟行路難閉戶定無元夜醉擁衾如對九秋寒  
池塘煙草弄風日此景當從晴後看

無寐

瓦裂慨平生

柳子厚云男兒立身一敗萬事瓦裂

無眠枕半橫逐臣常內

言謫夢自多驚投曉星河澹近山鐘鼓清晨炊知米賤  
猶恐費經營

又

孤衾萬感不能平幽獨捫心未覺盲疎雨過雲纔數點  
宿醒扶夢正三更瘴煙侵我須教老春物牽愁自在生  
疇曩犬雞無寸效如今方媿子真耕

草亭遠望

村舍無樓可望遠茅亭遠望似登樓飽看聚散雲無住

最愛縈回水自由詩思已隨芳草動春寒少為好山留  
誰將裘馬換美酒與我同消萬古愁

春晚

寒雞不飽亦知鳴布被堆中又五更喚此枕邊烟浪夢  
雜然風外鼓鐘聲花籠宿霧方衝濕牕識朝陽已弄明  
盥濯是身無始業一爐香火向三清

無詩

草創園亭隨意坐任綠花竹倩人栽鴈聲與客將寒去

柳色知春有信來，逸氣暫時因酒見。  
物華空自把詩催，案頭秃筆無才思。  
不賦一言真陋哉。

幽趣十二首

幽趣無人會，閒居我自知。  
筍尖穿落葉，花蘂掛遊絲。  
寒在蜂來少，風斜燕不遲。  
老夫無定力，破戒為題詩。

幽趣無人會，閒居趣自成。  
孤舟橫水靜，宿鷺入烟明。  
風絮低還起，苔錢斷復生。  
小門無客款，睡犬不聞聲。

幽趣無人會，須還我獨親。  
開書風為揭，得睡懶相因。  
雨

後竹色淨月中梅意真北山小園景莫怨未歸人

幽趣無人會人應為我愁山深雲易聚市遠酒難謀恃  
力猶驚鹿爭巢鵲避鳩老夫春睡美蝴蝶是莊周

幽趣無人會池塘又吐青雲間萬里客竹下一門扃空  
翠侵書帙飛花入草亭杖藜尋柏子慢火待餘馨

幽趣無人會欣然自解顏雨來飛鳥急沙靜小魚閒翠  
滴峰巒表香霏草木間吾心久忘物物意苦相關

幽趣無人會春風自過門青圓梅弄子綠隘竹生孫花

少蜂蝶瘦霧濃鷗鷺昏草寮藜藿飽癡坐等庸髡

幽趣無人會清閒五月中魚跳荷葉綠猿笑荔枝紅撥  
竹看新月鈎簾入好風神仙赤松地正恐自相通

幽趣無人會雖然亦有為晚涼尋薜荔細雨架酴醾掃  
屋除蛛網添花助蜜脾黃昏方隱几酒興又催詩

幽趣無人會天寬物自容夔休憐蹉跎魚勿為噉喁吟  
苦秋蟲適身閒沙鷺慵舉頭常見日山水任重重

幽趣無人會閒中見物天綠虛甘露結紅皺水晶圓倒

孕潛資化成行出暮羶寰中無巨細動靜各隨緣  
幽趣無人會雲依遠岫行寒塘時撥刺古木屢敲鏗壁  
殼拖涎鈍花飛度粉輕山泉烹石鼎孤啜不勝清

讀柳子厚若為化得身千億散上峰頭望故鄉之  
句有感

茅屋三間畫掩扉遮藏足得訟前非雨餘燕踏竹梢下  
風動蝶隨花片飛閒自鉤簾通野色時因酌酒見元機  
思鄉化作身千億底事柳侯深念歸

擬題黎簿尉梅隱用其韻

梅仙隱去事難論故種疎梅隱小軒雖似掃除顏色兄  
不妨遊戲簿書繁月明客共藏花影醉夢君應到酒尊  
我亦寄身修竹裏頗欣成性得存存

自寬

瘴濃複嶺煙如墨照以澄江一洗開芳草望中春去遠  
落花寒處鳥聲回風飄空翠入修竹潤滴幽蹊生綠苔  
不是從前賦清苦未應得向此中来

山人

自古山人合在山  
山人何幸此偷安  
身閒不束休文帶  
髮短聊簪子夏冠  
小冠杜子夏也  
酒量自來惟恨窄  
僦居隨分不須寬  
惟餘骨髓封者盡  
是君恩報答難

雜興

秋風城壘小  
遠望一消凝  
洞客雲中路  
漁舟水底燈  
有鍾聊是寺  
半俗不成僧  
羈旅其間者  
塵埃料可憎

八月間對月獨酌

月到空庭色界虛酒壺安頓向冰壺須臾萬瓦清露濕  
髣髴一輪丹桂孤獨酌難成狂態度閒身惟有醉工夫  
醉中孰與參禪趣此妙須知禪所無

簡孫立之

無分雙清岸醉巾蒼頭煮藥與誰親空煩食指報珍味  
阻向歌喉聽平聲落塵檻外寒花應照戶座中明水定生  
春仙翁若苦催歸旆不比山齋酒困人

黃義卿知郡母夫人挽章

往歲封川秋水肥板輿行色照萊衣江魚來處使君去  
弔鶴飛時孤子歸脂澤一奩留舊藹銘詩千古載餘輝  
阿參與我同題塔慰問苦茨涕欲揮

臘中會桂堂太守勸客滿觴嘗曰怕渡野塘寒酒  
罷且歸又曰月掛竹梢明愛此二語借為兩詩云  
不辭芳酒滿怕渡野塘寒淡月侵燈暗新春逗臘殘主  
人方鄭重客意敢闌珊聚散皆如夢相陪且盡歡

風穿花塢冷月掛竹梢明淺量三杯酒狂歌萬古情使

旌浮夜色歸棹有寒聲倦客無漿蔗朝醒未肯清

蔗漿  
析朝

醒見西

漢書

冬大暖桃李花飛如雨已而遽寒綿裘猶薄也

冬令常溫客不愁日來還用理衣裘浪開易落驚花雨  
過暖成寒似麥秋木葉搖風摧宿鳥江煙帶暝起沙鷗  
何人有酒生春意驅我新詩到筆頭

擬送傅推官吉先予以紹興己巳六月自復徙封  
吉先後一月到任

漂流憶昨到封川相繼人看渌水蓮屈指君猶成一任  
過頭吾已出三年款門對坐惟棋局判袂論情付酒船  
九月秋風去帆疾可能相望不依然

病酒

醒病初非病尋真却損真孤愁如送別清渴欲生塵嗅  
菊時思杜薰香未愜荀蔗漿知可析莫致一甌新

砌下黃菊暮秋始開為賦此篇

小欄培土待重陽雨洗金錢未肯忙終藉九秋扶正色

誰能三嗅為清香  
陶潛屬意空詩好  
胡廣隨緣却壽長  
古昔風流無處問  
碎花浮泛一尊黃

十月二十三日趙守侵早泛舟游西山有詩即席  
和此

開船侵曉霧轉棹順江流  
寺徑盤龍腹州旗映馬頭  
水邊香草細雲際小橋幽  
寫物欽清絕  
賡篇媿繆悠

再和

曩會今千日光陰起水流  
楚囚聊寓目古佛不擡頭  
鳥

避人聲雜雲藏洞穴幽一舟橫晚渡回首興悠悠

初春五言

積暖浮陽過輕寒宿沴消廉纖飛雨線清潤入花條節  
物病身老家山歸夢遙華嚴存至教不復見無聊

又七言

古人書卷慢翻尋齒髮蕭疎歲月侵萬里家山孤枕夢  
滿城風雨五更心蒙茸軟草涵空翠寂歷初花弄曉陰  
燕子未來寒意重數峰圓瘦入雲深

初夏

春物闌珊逐曉風  
芰荷歌角草茸茸  
野梅結子疎枝重  
老竹生孫翠影濃  
煮酒情懷還是客  
異鄉歌笑且相從  
醺然就枕皆佳處  
醉夢何妨度曉鐘

寒食雜興二篇

安居豈是安居地  
木偶漂來且庶幾  
日向柳邊回晚照  
雨隨雲去斂餘扉  
相逢又說分新火  
孤坐誰憐尚衲衣  
試破泥頭開煮酒  
菖蒲香細蠟花肥

小小園亭書掩關身閒不用更偷閒柳綿盡日高低處  
春色於人去住間已醉更應將酒解負花須索把詩還  
我今已是霜顛禿不比休文只鬢斑

閒興

陰陰修竹小茅廬足可安閒置老夫懶不觀書蟬得計  
貧唯煮菜鼠無圖吏今更肯來橋外鵬亦相疎遠坐隅  
閱遍華嚴方灌頂焚香千古問毗盧

出江

淨練已欣平似熨更因過雨助清深何人孤笛穿雲杪  
遠岸歸舟入樹陰鷗鳥慣看遷客面江山偏識老夫心  
半鉤小捲黃昏月欲得新詩箇裏尋

綠淨軒

我創新軒不費錢小將屋壁敞東偏誰留止水涵千丈  
今為陳人洗萬緣樹近直疑藍作幕月明方見玉為天  
箇中豈敢容凡客獨與清風泛酒船

病後涉園

百病相尋體未平幽懷感物強星星

煩懷却星星退之納涼句

地卑

積潤野梅瘦歲晚無霜山林青覽鏡但存心慷慨杖節

猶覺步鈴屨如何每事難精進日廢華嚴千字經

予自去年

寫華嚴日以千字為程後增至二千字而病病起欲寫復課千字猶羸倦未能候稍蘇耳

北山集卷二十二

欽定四庫全書

北山集卷二十三

宋 鄭剛中 撰

甲寅九月末雨至十月二十三日得晴聞是日六  
飛進狩諸將告捷

密雨重陰一月餘似聞征馬又長驅怪來林外升晴日  
已奏江邊報捷書

季天叙為人相宅過余求詩戲書二絕

由來南巷獨甘貧  
李老徒誇眼有神  
未暇相煩展高棟  
方圖種德效前人

一區懸磬已偷安  
常念風波世路艱  
若謂他時庇寒士  
會須令我作千間

別家山二絕

簡書催我就征途  
對坐西山暫索居  
聞說仕途巖險甚  
未應從此便相疎

就荒松菊莫相嗔  
未肯微官縛此身  
若有督郵須束帶

定將秫米付他人

代答

塞汚鉏蔓致蕃昌草木懷君豈易忘  
出為蒼生施此手他時寧使故園荒

雪中度馮公嶺二絕

雪積雲騰晝杳冥萬山玉立不勝清  
舉頭祇恐是尺五松栢已為環珮聲

琪花風亂欲成團度嶺人言路已漫  
我斥征夫第前邁

山翁不畏雪霜寒

范才翁惠醪醕

寶刀分惠過牆西  
瘦比寒梅不肯肥  
只恐東風苦無賴  
為君吹作玉花飛

題黃德老西亭二絕

花木橫斜轉小蹊  
疎簾竹屋任高低  
何人移得僧牕靜  
置在君家廳事西

吏冗文移紙作堆  
誰能亭榭靜中開  
直須事外關門坐

莫放人從門外來

和李端明題靈峯

靈峯特立萬山中秋逼濃嵐愈鬱葱旁絕逶迤雖寡助  
其如氣象自摩空

題大龍湫

龍湫噴薄高且清自料吾心略相似因流順勢無隱情  
傾倒向人只如此

題妙明師靜軒

小徑禪房瑣綠苔坐中聞葉亦幽哉此居不是能瀟洒  
但我初從闌處來

臘梅

縞衣仙子變新裝淺染春前一樣黃不肯皎然爭臘雪  
只將孤艷付幽香

宿長蘆寺下四絕

北風吹水拍船頭晚泊長蘆祇欲愁試遣長髯伺煙際

望中李郭亦來不

懷李叔海

來帆風飽自行快去漿浪高知進難舟子勿生淹泊恨  
偶然遲速我殊安

建鄴春江水拍天趁潮先發六宮船何時彤筆嚴清禁  
縹緲金鋪生瑞煙

風伯清塵過浙西隨春萬騎擁旌旗野人不識巡方意  
警蹕還憂為賊移

八月初四日謝雨采石中元祠

山柳葉疎容夜月古松枝勁起秋風定知明日便回首

百里牛磯烟霧中

中元祠古  
牛渚磯也

和樓樞密過洛陽感舊二絕

十年滓穢已澄清訪舊寧須得便行  
蚤關關中奉高祖

重興禮樂定章程

夢眼由來過幻差焚香祇好誦南華  
雲深漢殿猶衰草  
風緊洛陽無舊花

樓樞密過華山浩然有念古慕希夷之心謹用韻  
作二詩以箴之

四皓已閒猶管事留侯事了始求仙  
仙人石上出一手

寓意後人非偶然

太華絕頂一峯上有跡  
如巨手俗號仙人掌

且說高皇寬法律從他漢武好神仙  
關中脫使鬧如鼎  
自屏山樊能安然

陝西戲成二絕

邊城土俗自隨宜物色人情浩不齊  
略有江鄉相似處  
午煙林下一聲鷄

出門上馬雖所樂乍見秋風亦念家  
何日隨堤霜後路

亂飛榆柳踏平沙

隨鳳翔有何日在堤霜後路亂飛榆柳踏平沙之  
句今至堤上復用前韻

沐雨抗塵幾萬里勞生令我憶山家秋風小艇浮棊局  
野色侵簾水見沙

早行二絕

風柳驚霜日夜飄客程中夜馬蕭蕭據鞍髣髴如殘夢  
曉月一鉤猶未消

頽肩攜擔又催程寸許孤燈照壁青  
破縣殘更誤傳曉馬行十里見明星

和江虞仲華山二絕

仙人掌

意象軒軒勢入雲為誰出手若經綸  
夜扶星斗朝擎日氣力何知幾萬鈞

陳希夷無憂木

世累都忘春復秋婆娑槐木亦無憂  
不知千古雲間夢

夢見山前戰馬不

馬上口占三絕

秋陽未作結霜風沙細堤平落日紅  
客子何須念行役  
馬蹄多在柳陰中

露濃紅透棠梨葉風緊落疎喬  
麥花馬首漸東京洛近  
小寒無用苦思家

小枝圓熟棗纍纍短綠尖新麥透泥  
父老隨車說豐歲  
相公何苦出關西

九日

倦客飄零若轉蓬一尊深念菊花叢馬蹄踏處黃塵起  
費盡天涯落帽風

鴻溝

天下共知歸漢德東西那可限鴻溝雖令羽割大河水  
分得人心兩處不

靈壁驛有方公美少卿留題戲和于壁

君把使旌臨洛水我參樞幕過潼關秋風想見吹歸渡

先看淮南第一山

雨過

雲壓江邊草樹低  
麥搖秋色望中迷  
却知向晚有晴意  
雨過一聲村落雞

眼昏

月下對花燈  
下字年來漸覺老  
相關頗思瞑坐收餘力  
他日歸家祇看山

勝仲少卿公惠巖桂并詩二絕用韻和之

搖風暗綠疎疎葉困日輕黃小小花細認幽香已清絕  
更隨膏馥出君家

秋桂荷君親折贈傾盤高插傍胡床兒童謾自溫金鴨  
三日爐金不敢香

十二月二日臘祭前一日致齋惠照呈清叟察院  
三絕

峨冠執法公宜整端冕臨祠我亦嚴深炷爐香通問訊  
小寒清坐隔疎簾

臘祭精嚴古院幽鄰房不敢對茶甌何時芒履扶筇竹  
度嶺相尋溪岸頭

柳眼淺窺湖水畔梅花瘦著竹籬邊殘年未便無冰雪  
春意云何已斷然

懷山居二絕

春淺酒寒人密坐花深雨細蝶移枝十年未解作歸計  
此恨故園鷺自知

披叢尋得晚花瘦帶雨翦來春韭香憶把餘醺付松枕

明朝春夢不勝長

即事

竹輿曉出見湖山  
小室焚香暫得閒  
簾動東風入雙蝶  
清愁何處不相關

觀橘花

漸看綠葉秋來密  
最愛輕花露未晞  
何日增枝充素裹  
為渠臨酒脫金衣

素裹金衣  
皆見橘頌

禮部直舍枯竹嫩篠叢  
燕雀飛來欲折以二韻記

云

火邊遺竹但枯枝瘦筍叢生未及齊  
篠嫩不禁風燕立  
綠梢煙外起還低

發風水洞

山逼新寒驚遠夢風收細雨作初晴  
曉光微動鷗鷺起  
黃葉亂飛旗幟明

離家

我有君恩未報身勿因雲出念行人  
閉簾小閤團團坐

爾輩何妨暖到春

道中四絕

過雨山間雲出沒夕陽天際鳥浮沈  
男兒馬上志四海不是尋常客子心

水渌沙明不見泥寒煙漠漠樹垂垂  
漁人不識閒中趣輟網咨嗟望使旗

敗篋衝霜思往歲舊遊如夢慨平生  
鬢華已逐心事老溪水祇如前日清

寒意無多曉色交雲隨疎雨又還消山行全似三春日  
林際一聲婆餅焦

頻夜燭花

密炬香光照夜紅垂垂簾幕靜無風金盤五寸花成穗  
可但釵頭綴玉蟲

題安仁汪宰絕覽亭

目力所臨皆在下亭名絕覽未為叨丈夫心地須超出  
此外當知更有高

十一月十三日宿東林是日小雨不見廬山戲留  
絕詩于方丈

濃嵐暮雨隨人密  
遠壑幽巒向客慳  
清曠本吾胸次景  
不須雲裏覓衡山

過大冶縣

吏民俱困市廛小  
鷗雁相呼湖海寬  
蕃息誰能力耕鑿  
絃歌依舊好為官

二月十七日馬上

愁多髮白惟知老病起  
花飛不見春我得此生真偶爾  
休貪畫餅作癡人

河池秋雨

一雨一涼秋氣味  
添愁添病客情懷  
故園十畝檀欒好  
箇裏歸心未得諧

夜坐戲書

牕前寒雨正無邊  
案上含花燭影偏  
莫念江湖家萬里  
一杯徑醉且高眠

春日

朝來弄日花頭密，暗裏窺春柳眼多。  
任是老人情意薄，箇般時節奈愁何。

移司道中四絕

危梯破雪入河池，今日還轅歲一晷。  
道是得歸元未是，却移邊角利州吹。

魚驚鼓吹寒猶出，鳥避旌旗去肯留。  
顧我才疎何所用，空將行李戀清幽。

千山似筍憐渠瘦一水如藍對我寒今日看來心未靜  
盡將歸去靜時看

隨車千騎鐵成圍諸將前驅辨鼓旗不似東陽村舍畔  
芒鞋踏雨看山時

戲題堂前梅

健步移來知未久危根猶用小欄遮似能向我憐幽獨  
旋放南梢一兩花

憶故廬

不如當日在山家修竹叢中一逕斜飽食醉眠渾沒事  
風朝雨夜祇愁花

寒食日

休日文書得少閒試尋高處凭闌干落花芳草不勝恨  
細雨斜風都是寒

登烏奴

金壺皤腹貯春醪路入山堂脚脚高但得遠塵寬俗鞅  
不須臨下見秋毫

一絕寄家

驚枕夢回常半夜倚樓魂斷是斜陽如何行李猶淹泊  
未報蒲帆過武昌

骨肉聞已至廣安而連日有雨甚念之戲成絕句  
行人未到雨蕭蕭最苦醪醕葉盡飄風雨不遮春去路  
障泥空滯馬蹄驕馬惜障泥或遇雨不肯行

二絕寄章氏女子

女子有家難戀汝外甥似舅豈忘渠春風萬里空相憶

但願平安數寄書

益昌春晚百花開骨肉今朝對酒盃共說相思悲復喜  
就中憐汝不同來

寄吳信叟

聞說吳郎入漢中掃除亭榭祝東風三年不與故人醉  
留取數枝桃杏紅

春晚

東望故園天一涯官身到處且為家六房吏散無留事

滿袖亂紅攜落花

甲子春晴久三月晦得頻雨喜而為二絕句

夜半風雷破久晴四簷侵曉尚泠泠欣然擁被重尋睡

夢見漢中春麥青

春晚鬱蒸如溽暑朝來蕭颯似清秋千山雨後陰雲凝  
三日樓前野水流

元夜二絕

春風燈火傾城醉明月花枝滿地寒不是隴頭新麥綠

田夫未肯遠來看

門前又結綵為山千騎從容鼓吹間孰謂柴扉連竹塢  
一燈和月夜深關

益昌霪雨踰月負郭皆浸禱祠之後倉廩保全居  
民復業運使國博喜而賦詩輒成三絕句以報來  
貺

一月山前雨帶風拍天江水漲驚洪朝來莫怪波瀾靜  
收向詩翁筆勢中

千倉積粟棟崔嵬夜浸洪流亦殆哉不是脂膏天所惜  
豈應水到却平回

朝廷德澤徧封畿避水人家即日歸獨愧因漂如木偶  
未還田舍理柴扉

送何元英出峽三絕

呼兒攜婦裹書編月色灘聲共一船回首已遊三峽水  
此行那不謂登仙

莫憶雙溪水似藍暫留荊渚脫征衫更煩頻向沙頭望

望我西風出峽帆

壯士椎牛進酒卮五年不享鱸肥君如亦有垂涎興  
準備輕蓑隨我歸

出峽題舟中

才疎任重覺艱難今日東歸意已閒勿謂一舟輕似葉  
君恩端的重如山

忠州豐都觀乃陰長生之地山最高處欄檻圍一  
古井謂是真人丹成乘雲仙去之遺跡道士云時

有雲氣出井中過而賦之

莫向山頭覩古人青山之外已為塵彈圓朱橘懷中物  
雲氣有無何足詢

北山集卷二十三